

Učenje iz pozitivnih primjera iz prakse



Reforma odbrane i obavještajnog sektora su predvodile opsežniji proces reformi u Bosni i Hercegovini i u jugoistočnoj Evropi, rekao je visoki predstavnik i specijalni predstavnik EU Valentin Inzko na međunarodnoj konferenciji koja je održana danas u Sarajevu.

Rezultat je “promjena u odnosu između građana i onih čiji je posao da ih štite,” rekao je Inzko navodeći da je u BiH “reforma odbrane zamišljena sa senzibilitetom te provedena sa izuzetnim profesionalizmom.”

Kao rezultat, “BiH sada ima oružane snage koje su i operativno i ekonomski efikasne i koje su dale pozitivan i značajan doprinos međunarodnim misijama očuvanja mira u Africi i Bliskom istoku”, naveo je visoki predstavnik o specijalni predstavnik EU.

Visoki predstavnik i specijalni predstavnik EU je dodao da uspješno uvođenje demokratskog nadzora nad vojskom pokazuje da građani mogu uzeti moć u svoje ruke. “Činjenica je da se demokratija nije pojavila nekom magijom. Morala je biti promovirana i branjena.”

Inzko je istakao da su vojne i sigurnosne agencije “odgovorne građanima koje štite; da nisu na raspolaganju maloj grupi moćnih pojedinaca i da to ne trebaju ni biti. Isto se odnosi na sve što pripada građanima – uključujući, naprimjer, javna preduzeća i državnu imovinu.”

Visoki predstavnik je dao uvodno izlaganje na konferenciji o

provedbi OSCE-ovog Kodeksa o političko-vojnim aspektima sigurnosti, čiji domaćin su bile vlasti BiH.